



KENYATAAN MEDIA

KETUA PENGARAH
JABATAN KEMAJUAN ISLAM MALAYSIA (JAKIM)

BERKENAAN

MUHADHARAH HADITH PERINGKAT KEBANGSAAN 2018
'HADITH SAHIH PEMBAWA RAHMAT SELURUH ALAM'

1. Jabatan Kemajuan Islam Malaysia (JAKIM) menganjurkan **Muhadharah Hadith Peringkat Kebangsaan 2018** dengan kerjasama Kementerian Dalam Negeri. Muhadharah Hadith ini akan diadakan di **Dewan Datuk Mohd Syahir Institut Latihan Islam Malaysia, Bangi** pada **25 September 2018M (Selasa)** bersamaan **15 Muharram 1440H**. Upacara perasmian Muhadharah Hadith Peringkat Kebangsaan 2018 ini akan disempurnakan oleh **YB Dato' Dr. Mujahid bin Yusof, Menteri di Jabatan Perdana Menteri**.

2. Tema Muhadharah Hadith Peringkat Kebangsaan 2018 ini adalah **'Hadith Sahih Pembawa Rahmat Seluruh Alam.'** Pemahaman hadith yang betul dan tepat akan membawa ke arah perpaduan dan kesejahteraan umat seluruh alam. Seramai **350 orang** akan menghadiri Muhadharah Hadith ini yang terdiri daripada pegawai-pegawai dari kementerian / agensi kerajaan, Jabatan Agama Islam Negeri, Majlis Agama Islam Negeri, Jabatan Mufti Negeri-negeri, wakil NGO, rakan strategik, badan berkanun, ahli akademik dan pelajar dari universiti

awam dan swasta.

3. **Penyebaran hadith palsu** dalam kalangan masyarakat negara ini **amat membimbangkan** apatah lagi dengan perkembangan teknologi dan kemunculan media sosial yang menjadi pemangkin penularannya. Lebih parah, hadith palsu yang dikategorikan 'maudhu' turut dipetik oleh segelintir penceramah agama sekaligus menyaksikan masyarakat terutamanya yang cetek ilmu agama menerimanya dan menjadikan panduan serta amalan hidup. Senario itu bukan sahaja boleh mengundang kesesatan malah menjadi penyumbang kepada pembentukan masyarakat Islam ekstrem.

4. Semangat ekstrem menyampaikan motivasi, berkongsi maklumat kepada rakan dan keluarga serta melakukan ibadat tidak mengikut syariat merupakan **kesan penyebaran hadis palsu** secara meluas dalam kalangan umat Islam. Malaysia antara negara Islam yang terkesan menerusi penyebaran hadith-hadith palsu dalam kehidupan seharian, lebih buruk perkara tersebut tersebar luas seiring perkembangan teknologi terkini. Namun isu lebih besar ialah apabila hadith bersifat maudhu atau palsu itu dijadikan amalan dan kepercayaan sehingga menyesatkan akidah umat Islam yang menerimanya tanpa merujuk sumber dipercayai dan bertauliah. Ini dapat dilihat daripada sikap pendakwah atau penceramah yang mencari jalan singkat untuk mengumpulkan bahan ceramah mereka dengan menggunakan buku-buku berbentuk akhlak atau buku cerita yang kadangkala tidak memperdulikan kesahihan fakta yang dimuatkan di dalamnya.

5. Mutakhir ini banyak hadith palsu yang tersebar secara meluas melalui aplikasi media seperti *whatsapp*, *twitter* dan *telegram*. **Penyebaran hadith palsu**

menjadi pantas seiring dengan perkembangan telefon pintar. Sudah menjadi budaya masyarakat hari ini berkongsi maklumat dengan rakan dan keluarga bertujuan memberi motivasi. Namun tanpa sedar mereka telah melakukan dosa besar. Justeru menyedari akan bahayanya penularan hadith palsu dalam masyarakat, JAKIM dan KDN merancang untuk mengadakan Muhadharah Hadith Peringkat Kebangsaan 2018.

6. **Objektif** Muhadharah Hadith Peringkat Kebangsaan 2018 adalah untuk :-

- 6.1 Meningkatkan kesedaran terhadap **kepentingan mengetahui dan memahami disiplin ilmu hadith** seterusnya memberikan kefahaman yang jelas berkaitan hadith.
- 6.2 Menyediakan ruang interaksi dan soal jawab mengenai hadith antara para peserta dan ahli akademik terhadap isu-isu hadith di peringkat nasional.
- 6.3 Mengumpulkan **pakar-pakar Hadith bagi berkongsi pengalaman dan idea** berkaitan ilmu Hadith, maqasid syariah dalam hadith dan seterusnya mewujudkan sinergi dan jaringan rangkaian bersama di peringkat nasional. Ianya bertepatan dengan kedudukan Malaysia sebagai negara Islam yang meletakkan Islam sebagai agama persekutuan. Muhadharah ini dilihat sangat relevan dengan keperluan untuk memperkasakan hadith nabawi khususnya di Malaysia sebagai sumber dan lambang kepada pemahaman syariah dan penyatuan ummah. Ia juga sebagai pencetus untuk terus menerus memartabatkan hadith nabawi pada kedudukannya yang sebenar.

7. Muhadharah Hadith Peringkat Kebangsaan 2018 ini dijangka akan dapat memberi **impak yang besar dalam menzahirkan idea-idea yang bernas dan satu resolusi (*outcome document*) akan dihasilkan** untuk diketengahkan sebagai dasar dan program yang akan memberi manfaat kepada ummat Islam secara

menyeluruh dan ke arah keamanan sejagat. Justeru itu, Portal myHadith yang boleh digunakan sebagai rujukan masyarakat sebagai sandaran akan dilancarkan dalam muhadharah hadith ini.

8. **Harapan** daripada penganjuran Muhadharah Hadith Peringkat Kebangsaan 2018 ini ialah melahirkan **generasi rabbani yang menghayati dan mempraktik hadith sahih** berpandukan ajaran Ahli Sunnah Wal Jamaah.

9. Sehubungan itu, mohon jasa baik rakan media untuk mewar-warkan penganjuran Muhadharah Hadith Peringkat Kebangsaan 2018 ini dan membuat liputan dengan sewajarnya.

Sekian.

DATUK HAJI MOHAMAD NORDIN BIN IBRAHIM
Ketua Pengarah
Jabatan Kemajuan Islam Malaysia
Kompleks Islam Putrajaya
25 September 2018